

## Documenti riccaciati di à rivista di stampa di l'ADECEC

(<http://rivista.adecec.eu/index.php>)

### Mullizzu

Eri, hè statu presentatu u prugettu di trasfurmazione di u mullizzu ricuperatu. Ghjè un prugettu di Eric Brac de la Perrière, direttore di Eco-Emballages, pè creà una nova filiera è stimulà l'economia.

### Risicu di pulluzione

S'ella ci hè una pulluzione marina, e coste di l'isula ùn puderanu micca esse tutte protette. Ci vole à sapè chì più di 40 milioni di tonnellate di materie pericolose passanu à u largu di a Corsica.

### Tchernobyl

Pè disgrazia, hè sparitu u pattu d'eccezione chì assicura l'indipendenza di u candidatu selezziunatu pè fà u studiu nant'à e conseguenze di a catastroffa di Tchernobyl in Corsica. Un si sà ancu perchè hè sparitu. Avà, a cumissione di a CTC deve sceglie quale ferà u studiu.

### Ecologia

L'agenzia di l'acqua Rhone-Méditerranée-Corsica dice chì i stagni di l'isula sò in gattivu statu, è racumanda menu pulluzione è di preservà di e zone umide. U custattu di l'agenzia hè più bonu pè l'acque longu à e coste

### Mare

U documentariu di Georges Antoni, « Non assistance à mer en danger » hè statu premiatu in Marseglia, à u 38u festivalu di a fiura sottumarina. U rializadore hà custattatu chì l'omu disturba st'ecosistemu è si ne vada male. Ci volenu di più riserve induve a pesca è l'ammogliu sò interdetti. Cusì, e riserve permettenu à i pesci d'ingrandà è di ripruducesi.

### Euliane

In i paesi capicursini d'Ersa è Centuri, i paisani sò in zerga perchè i so orti ùn pruducenu più nunda per via di l'euliane. Anu scrittu à a ministra di l'ecologia pè dumandà un'inchiesta ufficiale.

### GALSI

L'associ A Sintinella è Aria linda pensanu chì u prugettu Galsi hè cumprumessu. Facenu sapè chì, à livellu mundiale, a falata di u prezzu di u gasu vada contru a rentabilità di u gasidottu. In più, in Sardegna, ci serianu opposizione, pè u più in Olbia.

### Parcu Naturale Regionale di Corsica

Eri, u Parcu Naturale Regionale di Corsica hà cappiatu i filanci è i falchi sopr'à a valle di u Taravu. Ghjera un incantu pè a pupolazione.